



Sesida dals

12 d'october 2021

Communitgà ils

15 d'october 201

Protocol nr.

898/2021

Incumbensa Degiacomi

concernent contribuziuns unitaras per las scolas bilinguas

Resposta da la Regenza

Per promover las linguas chantunalas rumantsch e talian po la Regenza permetter – tenor l'art. 33 da la Lescha davart las scolas popularas dal chantun Grischun (Lescha da scola; DG 421.000) – che duas linguas chantunalas vegnian duvradas il medem mument sco linguas da scola. Tenor l'art. 28 da l'Ordinaziun tar la Lescha da scola (Ordinaziun da scola; DG 421.010) permetta la Regenza las scolas e las classas bilinguas sin basa d'ina dumonda e sin basa d'in concept.

Tenor l'art. 16 da l'Ordinaziun da linguas dal chantun Grischun (OLing; DG 492.110) paja il chantun contribuziuns pauschalas da maximalmain 500 francs per scolara e scolar (SeS) als custs per installar scolas u classas bilinguas e da maximalmain 400 francs per SeS per manar talas scolas u classas. A chaschun d'ina revisiun parziala da la OLing ha la Regenza limità – cun il conclus dals 14 da schaner 2014 (prot. nr. 1/2014) – las contribuziuns chantunalas a 330 000 francs per onn a partir da l'onn da scola 2014/15. La revisiun parziala è stada necessaria per realisar l'incumbensa Tenchio concernent il pajament da contribuziuns da gestiun chantunalas a tut las vischnancas che mainan classas bilinguas en las linguas chantunalas. Fin a quest mument eran vegnidas pajadas mintgamai las contribuziuns maximalas da 400 resp. 500 francs per SeS. Damai ch'il dumber da SeS è s'augmentà en il decurs dal temp e damai ch'i è vegnidas permessas ulteriuras scolas e classas bilinguas, è la contribuziun per SeS sa reducida da 400 francs per l'onn da scola 2013/14 sin 296 francs per l'onn da scola 2014/15 ed importa actualmain 262 francs per SeS (onn da scola 2020/21).

L'incumbensa Degiacomi constatescha che la cofinanziaziun dal chantun na saja betg clera. Pervia da quai saja difficil per ils purtaders da scola d'installar e da manar classas bilinguas. En quest connex èsi da menziunar che la contribuziun pauschala n'è strusch sa midada dapi intgins onns da scola, perquai ch'il dumber da scolaras e scolaras è relativamain stabil. Uschia na chapescha la Regenza betg, pertge che las pitschnas differenzas duain chaschunar difficultads per ils purtaders da scola pertutgads.

Scolas u classas bilinguas permessas
e contribuziuns per l'onn 2021:

Purtader da scola	Contribuziuns 2021
Bever	10 500.00
Cuira	100 800.00
Domat	27 825.00
Puntraschigna	49 350.00
La Punt	6 300.00
Samedan	66 412.50
Schlarigna	19 687.50
Trin	29 137.50
Bregaglia	6 562.50
Glion	13 387.50
Total	329 962.50

Svilup dal dumber SeS / pauschala dals
onns da scola 2013/14 fin 2020/21:

Onn da scola	Dumber SeS	Pauschala per SeS
2013/14	807	400.00
2014/15	1113	296.00
2015/16	1138	289.00
2016/17	1203	274.00
2017/18	1248	264.00
2018/19	1310	251.90
2019/20	1290	255.80
2020/21	1257	262.50

Cun il conclus dals 2 da favrer 2021 (prot. nr. 85/2021) concernent las propostas da mesiras per promover las linguas en il chantun Grischun ha la Regenza prendì enconuschientscha dal catalog da mesiras correspondent da l'october 2020. En quest connex è l'Uffizi per la scola populara ed il sport vegnì incumbensà da realisar la mesira «Promover scolas bilinguas e trilinguas sin il stgalim da la scola populara entaifer vischnancas plurilinguas e germanofonas (mesira 2.10)». Per quests motifs prevesa la Regenza, cun la resalva ch'il Cussegl grond approveschia il preventiv, da budgetar e da pajar a partir da l'onn 2023 puspè las contribuziuns pauschalas maximalas da 400 francs respectivamain da 500 francs als purtaders da scola cun scolas e classas bilinguas. Quai chaschuna custs supplementars da var 200 000 francs per onn envers il preventiv 2022 ed envers il plan da finanzas 2023–2025. Cun quest proceder na dovri naginas adattaziuns da las prescripziuns tenor la OLing.

Sin basa da questas explicaziuns propona la Regenza al Cussegl grond d'approvar l'incumbensa qua avant maun concernent l'adattaziun da la budgetaziun per augmentar sco dumandà las contribuziuns pauschalas a favur da las scolas bilinguas e da la refuser concernent l'adattaziun da las basas legalas.



En num da la Regenza

Il president:

Dr. Mario Cavigelli

Il chancelier:

Daniel Spadin